

Hariini METRO 27/12/2010

MENGHAYATI ISRAK MIKRAJ

Perjalanan luar biasa Nabi SAW

Pengajaran dapat dimanfaatkan manusia untuk mengukuhkan keimanan

Maha Suci Allah yang menjalankan ham-ba-Nya (Muhammad) pada malam hari dari Masjidil Haram (di Makkah) ke Masjidil Aqsa (di Palestin), yang Kami berkati sekelilingnya, untuk memperliaharkan kepadanya tanda-tanda (kekuasaan dan kebesaran) Kami. Sesungguhnya Allah jualah yang Maha Mendedengar, lagi Maha Mengetahui." (Surah al-Isra, ayat 1)

Isra bererti Allah memperjalankan Nabi SAW pada malam hari dari Masjidil Haram ke Masjidil Aqsa. Mikraj ialah perjalanan Nabi SAW dari bumi (dari Masjidil Aqsa) ke langit (Sidratul Muntaha) untuk menghadap Allah.

Peristiwa yang dialami Rasulullah SAW ini adalah termasuk dalam kategori perkara ghaib (al-ghaibiyat).

Ternyata ia sukar untuk dijangkau pemikiran manusia kerana memang luar biasa. Perjalanan Rasulullah SAW dalam peristiwa ini membabitkan waktu yang singkat iaitu hanya mengambil waktu sepertiga malam.

Walhal jika difikirkan

jarak antara Masjidil Haram dengan Masjidil Aqsa bukanlah satu jarak dekat, apakah lagi untuk ke langit. Walaupun ada percanganan pendapat dalam kalangan ulama mengenai tarikh sebenar berlakunya Isra Mikraj, ia tidak boleh sama sekali dijadikan sebab untuk menolak kesahihan peristiwa itu.

Pada hakikatnya, peristiwa ini memang tidak dijelaskan secara terperinci dalam al-Quran, sebaliknya diterangkan lebih lanjut melalui hadis.

Sebenarnya, banyak lagi kisah menarik dalam al-Quran yang tidak dijelaskan secara terperinci. Malah, ada kisah diceritakan secara terpotong-potong laitus kedudukan ayat sesuatu kisah ada dalam beberapa surah.

Namun, yang penting adalah keimanan serta pengajaran daripada kisah berkenaan agar dapat dimanfaatkan oleh manusia.

Firman-Nya bermaksud: "Demi sesungguhnya, kisah nabi-nabi itu mengandungi pelajaran yang mendatangkan iktibar bagi orang yang mempunyai akal



MASJIDILAQSA lokasi peristiwa bersejarah Isra Mikraj

fikiran. Ia bukanlah cerita yang diada-adakan..." (Surah Yusuf, ayat 111)

Begitu juga dengan peristiwa Isra Mikraj, bukan sekadar satu kisah yang diceritakan kembali setiap kali tiba-tanya 27 Rejab.

Ia wajib diimani dan diambil pengajaran daripadanya. Antara pengajarannya ialah:

● Menyaksikan tanda kekuasaan Allah yang boleh meningkatkan keimanan

kepadanya. Allah Maha Berkuasa melakukan segalanya meskipun sukar untuk difikirkan oleh logik fikiran manusia.

Inilah yang dijelaskan pada ayat pertama daripada surah al-Isra, sekali gus menjelaskan antara hikmah utama berlakunya peristiwa Isra Mikraj.

● Menguji tahap keimanan seseorang terhadap Rasulullah SAW. Mempercayai apa-apa

yang disampaikan oleh Rasulullah SAW adalah satu kewajipan bagi setiap Muslim dan Muslimah. Rasulullah SAW tidak pernah sama sekali berdusta dalam setiap perbuatan dan percakapannya.

Firman-Nya bermaksud: "Dan Kami tidak mengutus seseorang Rasul melainkan supaya ia ditaati dengan izin Allah..." (Surah an-Nisa, ayat 64)



Sehari sepotong ayat

"Dan sesungguhnya tidak ada (balasan) bagi seseorang melainkan (balasan) apa yang diusahakannya." (Surah an-Najm, ayat 39)

Menurut keadilan Allah, seseorang manusia itu sebagaimana dia tidak memikul melainkan dosanya sendiri, maka dia juga tidak berhak mendapat balasan, melainkan apa yang diusahakannya.
- Tafsir Pimpinan ar-Rahman.

● Menjelaskan kepentingan ibadat solat fardu lima waktu yang wajib ditunaikan oleh setiap Muslim dan Muslimah.

Ibadat solat difardukan secara langsung oleh Allah kepada Rasulullah SAW dan umatnya melalui peristiwa Isra Mikraj. Perintah solat itu jelas merujuk kepada tujuan utama penciptaan manusia di dunia iaitu untuk beribadat kepada-Nya.

Banyak lagi pengajaran dapat diambil dan dihayati, seterusnya dijadikan panduan daripada peristiwa Isra Mikraj. Manfaatkanlah majlis ilmu yang menghuraikan mengenai peristiwa ini.

Penulis ialah pensyarah UnisZA